



二難寶鑑序



嘗云治婦人難治小兒尤難夫婦人
 莫難於產孕小兒之治莫難於痘疹
 孕而死者百無一二矣痘疹而死者十恒
 五六焉何也二者均以氣血為主婦人多
 偏而小兒多不足產孕順而痘疹逆故也
 一日京兆西淙洪公過邵武出所刻心鑑
 撮要一編曰在桂林時諸兒女患痘按圖
 驗症依方治之輒効俱賴以全予請而傳

之公以善本見贈方謀登梓醫生李榮復
出閨門寶鑑一編請曰盍合刻之濟陰保
幼皆閨門一事也內如回生丹者榮百試
百効此書並行濟物之功溥矣嘗讀夷堅
志載治痘疹倒靨法不知其神也一日孫
女犯此症殆甚急如法治之少頃即紅潤
如常遂以獲全併附于後命工同梓合爲
一書名曰二難寶鑑云噫閨門之中患是
症者按是書而治之吾知其無難矣

通暢回生丹源流問答

治產後一十八證

妊娘產後病難醫 我有良方付與伊

重羅大黃爲細末 醋熬三遍作膏奇

紅花炒浸加美酒 蘇木煎湯世所稀

更加黑豆汁三碗 重復煎熬和藥飴

第一子死腹中如何

答曰娘母因染熱病六七日間經傳臟腑熱極
以致子死母身墜在臍下不得分離命在須臾
急服回生丹三丸胎氣轉熱便生

第二產難如何

答曰緣胎氣已成子食母血臨月足餘血成塊俗呼為兒枕臨產時兒枕先破血裹其子故難產但服此藥逐敗血斯須自生其橫生逆生胎衣不下等同

第三產後胎衣不下如何

答曰母子分解既訖母受其產血入於衣中被血所脹因此胎衣不下令人脹悶湯水不進急頓回生丹三兩丸逐去衣中敗血自然而下矣
第四產後血暈起止不得眼見黑花如何

答曰產後三日血氣未定還入五臟奔冲於肝醫人不識呼為暗風依此方治之即愈

第五產後口乾心悶如何

答曰產後七日以來血氣未定緣三日後食麵麵與血結積聚在心是以煩渴醫人不識呼為胸膈壅悶但服此藥萬無一失

第六產後寒熱如何似瘧

答曰產後虛羸血入於心肺則熱入脾胃則寒熱極反渴醫人不識呼為瘧疾悞損產婦不知其數宜依此方急急救之

第七產後四肢浮腫如何

荅曰敗血走注五臟轉滿四肢停留回轉不得
乃化為浮腫遂致四肢俱腫醫人不識呼為水
腫水腫與血腫不同水腫氣急而小便澀血腫
氣滿而四肢寒先服回生丹去敗血後服利水
氣藥

第八產後血邪如鬼神顛狂言語無度如何

荅曰產後敗血熱氣冲心因物觸動所以心煩
燥熱言語顛狂醫人不識呼為風邪宜急服回
生丹

第九產後失音不語如何

荅曰心有七孔三毛敗血冲心流入孔中被血
所悶言語不得醫人不識呼為脫陰脫陽失音
雖是難治無方下藥殊不審視娘婦經脉行與
不行順與不順今血氣妄行流入心孔却乃反
為難治宜服此藥

第十產後瀉痢痛如何

荅曰娘婦未滿月誤食酸冷堅硬之物與血相
搏流入大腸不得尅化或瀉膿血或作汚刺不
得安穩宜服此藥

第十一產後百節酸疼如何

答曰生產娠婦百骨支節開張產後敗血流入諸處停留日久結聚不散壅滯虛張是以百節酸疼庸醫不識呼為風濕下藥誤損娠婦多矣但服回生三五服去其凝血即瘥

第十二產後小腸尿血似鷄肝如何

答曰娠婦月中將理失宜飲食不得應心兼以惱怒以致敗血流入小腸閉却水道是以小腸澁結似鷄肝流入大腸遂使大便澁難醫人不識呼為五臟淋漓傷損心肝以致瘀血成塊形似鷄肝殊不知敗血入腸閉澁水穀等道以致如此但服此藥三九必得全美而無差矣

第十三產後崩中如何

答曰產後敗血惡露未止之間宜當服藥調五臟或食酸鹹之物寒熱不一因此榮衛不得調和以致宮中便作崩漏形色如肝渾身潮熱背膊拘急胸中煩悶醫人不識察其情一槩云為崩下且婦人癸水將至暴下不止愆期過度故曰崩漏今娠婦血氣正行失於保養以成此疾但服回生三兩九止其病源萬不一失

第十四產後胸膈氣滿嘔逆不定如何

荅曰產後血停於脾胃食滿冲心心氣不平胸膈脹滿嘔吐遍多醫人不識云謂翻胃且人以穀氣為主胃口喜容受而不運動傷胃口而不容受飲饌故曰翻胃况妊婦血停於脾心氣相冲而為嘔逆如何謂之翻胃但進回生丹二三丸萬無一失

第十五產後咳嗽寒熱不定如何

荅曰產後不能忌口每食熱麵結痰為塊上喘咳嗽四肢寒熱心悶口乾渾身煩燥睡夢多驚

躰虛無力經脉不來名曰血閉腹痛面赤因此難治變作骨蒸治須仔細若服回生丹無應縱有盧醫扁鵲診視亦不得夕停於世良可悲哉第十六產後喉中似蟬聲如何

荅曰血敗冲遏於心轉入肺肺主氣血冲心氣與血并結成塊入於喉中聲似蟬鳴人以為怪娠婦得此病者十不救一回生丹一丸服即愈第十七產後面黃舌乾鼻中流血遍身色點繞頂生斑如何

荅曰產後敗血五臟六腑皆滿流入肌膚敗血

欲出走流四肢熱結便住轉還不得故有此疾
可畏可懼婦患此證十無一二生活如服此劑
必應痊愈

第十八產後便澁腰疼似角弓如何

答曰娠婦百日之外方脫躰今在月中七日以
來食油麵爽口之物以致煩熱不得安寧因循
不肯用藥調治兼百日內過傷房事或久病後
坐卧當風取其一時快樂不肯房中將息宜乎
有此病也宜服回生丹即愈

續增

產後小便澁大便遲滯不通

血入房中誰更知 小便赤澁大便遲

作寒作熱常多汗 如醉如痴似遊絲

花發目前如碎錦 病纏心內似有思

只消一服回生藥 莫是庸醫騙帛醫

產前胎後下血

妊娠始動願求醫 四物湯中賤理芪

艾葉阿膠兼熟地 川芎當歸白芷齊

香附更兼紫蘇葉 水煎一服便相宜

世人識得玄中妙 夫婦和諧子嗣滋

婦人經脉不通

婦人經脉。猶地之溝渠也。溝渠壅塞。則水道不行。婦人氣閉。則經脉不通。切不可因循養病。而喪軀。要當急服回生丹。以疎通之。保其天和。遂其化工。美哉。

不調榮衛服難行

氣脉相和經自勻

寒熱失宜勞不息

氣因生冷不相宜

千金瘦盡非今日

漸漸尫羸話語遲

我有回生通暢藥

一服能除萬種疑

室女經痞不通

室女經脉與婦人不同。隱藏與胞絡漸入子宮。至十三歲出見。始知人道。苟或喜怒寒濕失宜。因此經痞不行。痞者乾渴也。宮中癸水不行。猶地中之水陰陰而乾。痞也。室女身中亦就是也。易曰。天一生水。地六成之。要先服四物湯三五劑。使癸水生於宮中。然後以回生丹引導。而疎通。謂之水火既濟。水火既濟。如之何而不通哉。勿信庸醫作癆瘵醫之。

純陰何事月經遲

貪食酸鹹誤損人

飲食方養風冷坐

血生血海海凝宮

華池不潤三焦熱 煙氣喉中腹悶疼
神功自有回生藥 一服能通萬事亨

通暢回生丹藥料

當歸 川芎 香附子 玄胡索

蒼朮 蒲黃 白茯苓 桃仁膏

熟地黄 已上各一兩 牛膝 三稜

山茱萸 五靈脂 地榆 甘草

羌活 陳皮 芍藥 已上各五錢

木瓜 青皮 人參 白朮 已上各三錢

烏藥 二兩五錢 良薑 四錢 木香 乳香

沒藥 已上俱一錢

右照分兩為極細末聽用大黃膏和丸

通暢回生丹製大黃膏方法于后

却將大黃一斤為細末

蘇木 三兩剉碎用河水五碗煎汁

紅花 三兩炒黃色入好酒一大壺同煮三五滾去紅花不用存汁用

黑豆 三升煮熟取汁三碗去豆不用止用豆皮

右先將前大黃末下鍋內着好米醋三四碗攪

勻熬成膏如此三遍次下紅花酒蘇木湯黑豆

汁攪開大黃膏入內又熬滾成膏取出盆內盛

之將鍋粬焙乾為末與前藥末和勻却將大黃膏調丸如彈子大不拘時每服一丸酒頓化

一產後頭疼身熱有汗謂之傷風加桂皮末二分葱薑湯服

一產後頭疼身熱咳嗽無汗謂之傷寒加麻黃末三分葱薑煎頓化服

一產後咳嗽不止加人參三分五味子八粒蘇葉三片煎酒頓化服

一產後無乳加天花粉末二分歸身三分川山甲二分炙黃色為末同入酒內

化藥不拘時服令乳母揉奶千餘轉其乳如湧泉自出

一分治室女經痼不通加蓬朮三分赤芍藥末二分薑黃末五分天花粉末四分同入酒內頓化不拘時服經脉自然通矣

一分治婦人尋常月信前後不一每服一

丸空心酒頓化服之忌生冷酸鹹之物

治胎前產後經行腹痛源流大抵婦人凡過經來而臍腹撮痛者蓋衝任二脉弱而血氣與小

腸二經虛而受風便下之際血氣搏於風冷二
氣相攻而痛但服回生丹無不効驗矣

門寶鑑通回生丹